

Carnascèr te Fascia

Ti paijes de noscia val vegn endrezà festes te piaz, defilèdes, spetàcoi e bai tel temp più mat de l'an

Sozietà - Chest an l Carnascèr é dassen curt e te pech manco che doi setemènes l'é jà ora de serèr sù chest temp aiegher spetà dai bec e dai joegn per jir en mèscra e per se goder vèlch di de vacanza da scola.

Te Fascia i desvalives comitac manifestazions é jà endrezé per i apuntamenc che ponta via ai 4 de firé con la jebia grassa e se sera col mèrtesc gras ai 9 de firé.

A Moena te chisc ùltime egn i aea perdù mingol de gaissa, per chest la neva aministrazion se à pissà de soscedèr amò enteress con n concors, per spenjer a tor pèrt no demò la jent del post ma ence duc chi che vel se goder, e ence se meter a la proa tel segn de n renovà spirit del carnascèr. Endèna la tradizionèla defilèda del mèrtesc gras che va fora per la strèdes de paisc da mesa les 3 domesdi, na juria valutarà la mèscres che se à scrit e la premiarà la categories di gropes, mèscra individuèla e bec. Chi che vel tor pèrt i cogn se scriver ite te comun de Moena, i gropes i cogn esser de amàncol 5 persones, i cogn paèr na quota de 20 euro e i pel aer azess a n contribut de 200 euro.

Sul percors vegnarà dat fora l vin brulé di Alpins e la fortaes del Grop de Ciajeole e la defilèda se sturtarà te Sotegrava con la premiazion, dò amò festa con musega dal vif.

Ence a Vich en mèrtesc ai 9 de firé da les 3 domesdi sarà la tradizionèla defilèda di cères per l zenter del paisc e dò te piaz Massar sarà la Mèscres Fascènes e se podarà



Da Carnascèr te ogne paisc de Fascia vegn endrezà festes, defilèdes e momenc gustégoi.

cercèr i douces tipics. A Soraga l Comitac Manifestazions endreza per en sabeda ai 6 de firé da les 9 da sera aló da la Gran Ciasa l Gran Bal en mèscra con la Dolomites Bier Band. La trei mèscres più beles vegnarà valutèdes da na juria e premièdes con de bie pesé.

L Comitac Manifestazions e la Scola de Schi Vajolet de Poza enveze fèsc festa jà en jebia grassa, ai 4 de firé, su la neif de Fraine da mesa les 9 da sera. Se podarà vegnir jù per l portoi con vigni sort de èrt, ma senza motores. Vegnarà premià i 5 enjignes più originèi e sarà mùsega e divertiment per gregn e pìcoi. Iscrizions e info al 349.5003763.

A Ciampedel la festa vegn endrezèda en domenica ai 7 de firé da mesa les 3 domesdi te Piaz de paisc: te la defilèda apede a la feures tradizionèles del Carnascèr fascian sarà la mèscres che moscia a na vida ironica i mestieres tradizionèi e i personajes de la lejendes de Fascia. Ai 9 de firé da les 3 domesdi se serarà ofizialmenter l Carnascèr con n gran fech sun Pian. (cri.m)